



九四九四



松陵文獻序


吳江始立縣在錢氏有國時志書昉於朱長文之圖  
經竇德遠吳本史鑑陳理周永年皆有作並佚不傳  
唯莫氏徐氏二志存焉莫志詳而體裁未備徐志簡  
而疎漏甚多自嘉靖至明末又百餘年曠無紀述亡  
兄力田乃爲松陵文獻一書獻以紀先賢之事蹟文  
以錄邑人之詩文文集未成而遭潯溪之禍獻集得  
諸燼餘後三十年未乃克校而梓之嗚呼史學之廢  
文人爲之也史以載事事欲其核事苟核矣文卽不





閩中林小眉先生著

麟  
麒  
集



求野堂藏板



遷而班固稱之不過曰其文直其事核苟直且核史家之能事畢矣自歐陽公後知此義者蓋寡未嘗備員史館博觀近代文人之作而益服亡兄之善著書深痛其史之散佚而幸此書猶存謹刻之以行世蓋吾邑之文獻得此而後足徵且使人因此書以想見亡兄史書之大畧與其結撰之苦心則雖不傳猶傳也已

康熙癸酉臘月既望弟耒拜述

松陵文獻目錄

獻集

第一卷

人物志一

莊忌

子助

張儼

張翰

陸雲公

子瓊

顧野王

陸從典

陸龜蒙

第二卷

人物志二



謝濤 子絳

魏憲

王份

范成大

趙礪老附

莫大猷

子子文

盛明遠

譚大年

甯居仁

王原傑

子思忠

徐仁榮

章德剛

崔天德

子齡

第三卷

人物志三

莫禮

張瑾李鼎徐衍馬達

竇德遠

葛德昭

吳簡

曾日章

平思忠

何源

黃玘

子著

盛景

范琮

梅倫

馬忠

莫震

鈕文

莫昂

徐琰

父真

沈信

第四卷



人物志四

汝訥 父思聰子泰

吳璠 從子璿

葉紳 孫可成

吳洪 子山巖

王哲

沈漢

陸金

何遵 王鑾

第五卷

人物志五

盛應期

陳天祥

曹璞

王守

周用

顧昂

毛衢

沈啓 孫季文

張源

顧曾唯

周大章 弟大韶

第六卷

人物志六

孫從龍

潘志伊

袁黃

吳默

沈瓚

沈琦 弟琬珣



孫養正

陳良模

趙士諤 從子廕

周道登

第七卷

人物志七

周宗建

吳煥

潘有功

葉紹袁

朱天麟

盛王贊

汝可起

吳易 祖邦楨

孫兆奎

王景亮

趙庾 顧祖奎張起

吳有涯

第八卷

人物志八

儒林

王蘋 從子誼從孫楸

陳長方

楊邦弼

沈義甫

徐師曾

張德載 孫世偉

杜偉

朱陞宣

顧文亨



孝義

陸十七

華翥

奚士龍

陳和甫

李真

陳晉

徐孝祥

盛逮

莫轅

徐昌伯

弟季昭

鈕釗

沈希旻

龐景華

陸琦

吳璋

潘翼

吳理

顧寬

龐鏞

吳成

顧宗義

李濟

沈忠

弟孝

陸恒

陸雲衢

戴天叙

吳承恩

蕭雲程

吳允夏

曾祖秀

陳國珍

孔尚賢

陳清

迓紹原



第九卷

人物志九

文學

謝景初

盛輿

張淵

黃本

凌昌

陳謨 徐彰

陳玠 從弟琮

鄒奕

沈黻

蕭規

朱應辰

陶振

梁時

吳驥 子鉉

莫旦

趙寬

姚明

崔徵

王寵

陳九章

陳理

朱旦

陳策

張銓

顧大典

沈璟

莊元臣

俞安期

潘一桂

卜舜年 莊汝培湯三俊



周永年

沈自然

吳翮

史玄 趙渙

第十卷

人物志十

隱逸

朱象先

松江漁翁

李無晦

孫銳

朱良實

顧諒

張壽

謝常

尹寬

史鑑

曹孚

王雲

王叔承

沈汝和

朱鷺

翁遜

包捷

徐白 趙瀚

戴笠

章夢易顧偉

吳宗潛

弟宗漢宗泌從子  
炎葉繼武吳珂

張雋

董二酉

吳祖錫

王錫闡

朱鶴齡

顧有孝

周安

朱明德

計大章王載



張嘉玲

第十一卷

人物志十一

高僧

德一

善如

祖瑛

原妙

弘道

古拙俊

真正堂

寶南琛

壽無瑕

智瑄

真可

性冲

通問

通賢

道術

陳昉

富恕

雲外道者

胡道安

楊茂林

鄧青陽

俞嗣宗

藝能

馬孜

盛寅 弟宏子 僕從子倫



盛伯瑄

康仲康

周孟堅

陸復

鄒明

沈與齡

周叔宗

張金

皇甫焯

黃宸

第十二卷

人物志十二

列女

張二娘

獨吉氏

阮妙瞻

楊六娘

錢氏

陸氏

凌淑貞

張福真

王氏

沈氏

顧氏

陸潔

錢如潔

沈氏附

黃氏

費氏

沈氏

沈氏

姜氏

凌貞女

沈氏



何氏

周氏

張氏

張氏程氏附

顧氏

許氏徐氏顧氏沈氏

張氏

邵七妻附

張氏

顧詵妻

陳氏吳氏附

徐氏

翁妻附

沈氏

邵一妻附

陳五媳

徽商二婦

徐氏

寓賢

方滋

楊維楨

錢惟善

倪瓚

丁敏

董遠

王禕

李幹

張明善

第十三卷

官師志一

盛斌

司馬福

趙球

馬尊

李問

王庭堅



張先

裴煜

孫覺

林肇

程端

向子韶

曾懋

程俱

徐勣

李光

石公轍

徐似道

李衡

柳楹

趙廣

莫若冲

袁韶

張達明

呂祖憲

孫子秀

李椿

王柔

哈刺哈孫

唐棣

皇甫璧

高仁

張顯祖

段廷珍

干文傳

那海

第十四卷

官師志二

孔克中

張居敬



廖欽

劉幹

陳耘

蔣奎

陳敏

邢寬

李昇

賈忠

葉錫

王懋本

劉彪

梁和

韓槃

陳堯弼

孫顯

王鑑

金洪

郭郭

劉澤

張玄

徐欽

張明道

喻時

王國光

萬思謙

楊芷

李遷梧

吳一本

李三省

第十五卷

官師志三

劉時俊

馮任



霍維華

晏清

熊開元

章日烱

葉翼雲

趙鈞

以下教職

瞿莊

袁時億

丁侃

楊弼

林彤

陳賓

劉文輝

陳用貞

梁炬

王維孝

蔣弘憲

解學臯

陳國器



子事怨望稱疾不朝陰有邪謀鄒陽奏書諷之不納  
文辭著名而忌尤尊重號曰莊夫子久之吳王以太  
鼻招致遊士忌與齊鄒陽淮陰枚乘等俱仕吳皆以

松陵文獻

獻集卷一

邑人潘檉章力田

長永鄒  
振錫西  
歸并志

人物志一

漢

莊忌

子助

莊忌會稽吳人也漢興諸侯王皆自治民聘賢吳王  
鼻招致遊士忌與齊鄒陽淮陰枚乘等俱仕吳皆以  
文辭著名而忌尤尊重號曰莊夫子久之吳王以太  
子事怨望稱疾不朝陰有邪謀鄒陽奏書諷之不納



於是忌等知吳不可說皆去之梁是時梁孝王以景  
帝少弟貴盛好詞賦得忌等大喜皆善遇之嘗從入  
朝蜀人司馬相如見而悅焉因免官客遊梁於是諸  
侯遊士莫不畢至而齊人羊勝公孫詭多奇邪計得  
幸於王教王求爲漢嗣刺殺議臣袁盎等天子疑之  
使者冠蓋相望責梁王王始與勝詭有謀鄒陽爭以  
爲不可被讒下吏忌等皆不敢諫及梁事敗勝詭死  
王幾危賴陽入長安說王長君乃得解事具漢書鄒  
陽傳忌有高節善辭賦亞於相如作哀時命篇宋朱

熹以爲得騷人遺旨云

莊助忌之子也或言族家子也郡舉賢良對策百餘  
人武帝善助對獨擢助爲中大夫其後征伐四夷軍  
旅數發內改制度朝廷多事屢舉賢良文學之士公  
孫弘起徒步數年至丞相開東閣延賢人與謀議朝  
覲奏事因言國家便宜上令助等與大臣辨論中外  
相應以義理之文大臣數詘其尤親幸者助與東方  
朔枚臯吾丘壽王司馬相如相如嘗稱疾避事朔臯  
不根持論上頗俳優畜之唯助與壽王見任用而助



最先進建元三年閩越舉兵圍東甌東甌告急於漢  
 帝以問太尉田蚡蚡以為越人相攻擊其常事又數  
 反覆不足煩中國往救也自秦時棄不屬於是助詰  
 蚡曰特患力不能救德不能覆誠能何故棄之且秦  
 舉咸陽而棄之何但越也今小國以窮困來告急天  
 子不振尚安所愬又何以子萬國乎上曰太尉不足  
 與計吾新即位不欲出虎符發兵郡國乃遣助以節  
 發兵會稽會稽守欲距法不為發助乃斬一司馬諭  
 意指遂發兵浮海救東甌未至閩越引兵罷後三歲

閩越復興兵擊南越南越守天子約不敢擅發兵而  
 上書以聞上多其義大為發興遣兩將軍將兵誅閩  
 越淮南王安上書諫會閩越王弟餘善殺王以降漢  
 兵出踰嶺而罷上嘉淮南之意美將卒之功乃令助  
 諭意風指於南越南越王即遣太子隨助入侍助還  
 又奉詔書諭淮南王王上書陳謝上大悅助繇是與  
 淮南王相結王志堅曰東甌南越是二事二時王志  
 刪去數句似合為一事又刪去淮南王  
 上書句然則何助侍燕從容上問助居鄉里時助對  
 故諭淮南耶曰家貧為友壻富人所辱上問所欲對願為會稽太



守於是拜爲會稽太守數年不聞問賜書曰制詔會稽太守君厭承明之廬勞侍從之事懷故土出爲郡吏會稽東接於海南近諸越北枕大江間者濶焉久不聞問具以春秋對毋以蘇秦從橫助恐上書謝稱春秋天王出居於鄭不能事母故絕之臣事君猶子事父母也臣助當伏誅陛下不忍加誅願奉三年計最詔許因畱侍中有奇異輒使爲文及作賦頌數十篇後淮南王來朝厚賂遺助交私論議及淮南王反事與助相連上薄其罪欲勿誅廷尉張湯爭以爲助

出入禁門腹心之臣而外與諸侯交私如此不誅後不可治助竟棄市始助與邑子朱買臣俱侍中貴用事湯尚爲小吏趨走二人前後湯排陷助又知買臣素貴故陵折之買臣見湯坐牀上弗爲禮買臣深怨嘗欲死之後遂告湯陰事湯自殺上亦誅買臣潘子曰漢書稱莊夫子義至高然見幾遠引不肯正言強諫用免於禍武帝征伐之謀發端於南越而助贊成之世咸惜張湯陷助以深文然楚士深怨好招權利其爲人與朱買臣相類先後並爲會稽守而誅



死亦同豈不哀哉莊氏後避孝明帝諱改爲嚴氏今  
忌墓在邑西南境爛溪之傍號爲嚴墓邨郡邑三志  
皆誤以爲助墓考嘉興志助墓在郡城天寧寺後忌  
墓在嘉興縣新城鎮今助墓在寺後者碑記尚存而  
新城之忌墓莫知其處以地圖考之嚴墓在新城北  
僅數里舊屬秀州則其爲忌墓也明矣吳郡志有嚴  
助傳頗畧姑蘇志差詳而皆不載其父忌豈以布衣  
輕於侍中耶余故因漢書本傳稍爲詮次著於篇  
吳

張儼

子勃

張儼字子節吳時縣境未分故吳錄稱儼吳人儼童  
少知名常與張純朱異同詣將軍朱據據欲試之語  
曰老鄙相聞飢渴甚矣爲吾各賦一物夫腰裏以迅  
驟爲功鷹隼以輕疾爲妙何必積思三人皆隨日立  
成據大悅儼賦犬云守則有威出則有獲韓盧宋鵲書名竹帛儼經緯博識族  
人張溫稱之曰吾家顏子也拜大鴻臚吳寶鼎元年  
正月與五官中郎將使晉弔文帝喪吳主皓曰今南  
北通好以君有出境之才故相屈行儼對曰皇皇者



華臣蒙其榮惟古人延譽之美磨勵鋒鏑思不辱命  
既至晉賈充裴秀荀勗等欲傲以所不知而不能尚  
書僕射羊祜尚書何禎並與結好及還道卒子勃撰  
吳錄三十卷翰自有傳

晉

張翰

張翰字季鷹有清才善屬文詞義新麗造次立成而  
縱任不拘時人號爲江東步兵會稽賀循赴命入雒  
經吳閶門于舟中彈琴翰初不相識乃就循語大悅

之問循知其入雒曰吾亦有事北京卽同載而去不  
告家人晉泰安元年齊王冏辟爲大司馬東曹掾翰  
謂同郡顧榮曰天下紛紛禍難未已夫有四海之名  
者求退良難吾本山林間人無望於時子善以明防  
前以智慮後榮執其手愴然曰吾亦與子采南山蕨  
飲三江水耳翰見秋風起乃思吳中菰菜蓴羹鱸魚  
膾曰人生貴適志何能羈宦數千里以要名爵乎作  
思吳江歌遂命駕歸俄而冏敗人謂之見幾翰任心  
自適不求當世或謂之曰卿乃可縱適一時獨不爲



身後名耶答曰使我有身後名不知卽時一盃酒性  
至孝遭母喪哀毀過禮年五十七卒有首丘賦及詩  
文數十篇宋乾道三年知縣趙伯虛祀翰與范蠡陸  
龜蒙於淞江之上題曰三高祠至今有司春秋奉祀  
弗絕也

梁

陸雲公

子瓊

陸雲公字子龍父完字楚卿梁寧遠長史雲公五歲  
誦論語毛詩九歲讀漢書略能記憶從祖倕與沛國

劉顯質問十事雲公對無所失顯稱異之及長州舉  
秀才累遷宣惠武陵王平西湘東王繹行參軍雲公  
先製太伯廟碑吳興太守張纘讀其文歎曰今之蔡  
伯喈也纘至都掌選言之武帝召爲尚書儀曹郎入  
直壽光省知著作郎事累遷中書黃門郎兼掌著作  
雲公善奕碁常夜侍坐武冠觸燭火帝笑謂曰燭燒  
卿貂帝將用爲侍中故以此戲之時天泉池新製鱗  
魚舟形狹而短帝暇日常泛此舟唯引劉之遴到漑  
朱异雲公年位尚輕亦與焉人以爲寵太清元年卒



年三十七葬橫山至今居人呼爲陸墓山在邑西北

境徐志以雲公爲梁門下侍郎不考之過耳張纘與其叔襄兄晏子書曰

黃門殞逝非惟貴門喪寶實有識同悲其爲士流推重如此有文集傳於世子瓊字伯玉六歲能詩大同末父雲公受武帝詔較定碁品到漑朱昇並集瓊時八歲於客前覆局繇是都下號曰神童武帝召見風神警亮進退詳審帝甚異之年十一居父喪有至性從祖襄歎曰此兒必荷門基所謂一不爲少及侯景亂攜母避地於縣之西鄉讀書晝夜無怠遂博學善

屬文陳天嘉中以文學遷尚書殿中郎爲文帝所知會討周迪陳寶應等都官符及諸大手筆竝勅付瓊遷新安王文學掌東宮管記宣帝爲司徒妙簡僚佐吏部尚書徐陵薦瓊識具優敏文史足用進居郎署歲月過淹乃除司徒左西掾尋兼通直散騎常侍齊大建中爲給事黃門侍郎轉中庶子領大著作撰國史後主卽位直申書省掌詔誥至德元年除度支尚書叅選事初雲公奉梁武帝敕撰嘉瑞記瓊述其旨而續焉自永定迄於至德勒成一家之言遷吏部尚



書著作如故瓊詳練譜牒雅有識鑒居吏部號爲稱職性謙儉位望雖隆執志愈下第宅輿服不尙侈靡俸祿所入散之宗族家無餘財暮年淡懷止足思避權要恒稱疾不視事會遭母喪詔加贈卹後主自製誌銘瓊哀毀太過至德四年卒有文集二十卷子從典自有傳

陳

顧野王

顧野王字希馮是時吳江地屬吳縣故吳郡志以爲

吳縣人祖子喬梁東中武陵王府參軍事父烜信威臨賀王記室兼本郡五官掾竝以儒術知名野王七歲讀五經畧知大指九歲能屬文常製日賦朱异見而奇之年十二隨父之建安撰建安地記二篇及長編觀經史精記嘿識天文地理著龜占候蟲篆奇字無所不通初爲臨賀王府記室宣城王爲揚州刺史野王及瑯邪王褒竝爲賓客王甚愛其才野王又善丹青王於東府起齋令野王畫古賢命褒書贊時稱二絕及侯景亂野王以父憂歸本郡乃召募鄉黨隨



義軍援京師野王體素清羸裁長六尺又居喪過毀殆不勝衣及杖戈被甲陳君臣之義逆順之理抗詞作色見者莫不壯之城陷逃會稽陳天嘉中勅補撰史學士大建中爲太子率更令尋領大著作掌撰國史知梁史事後爲黃門侍郎光祿卿知五禮事卒贈秘書監右衛將軍野王少以篤學至性知名在物無過辭失色觀其容貌似不能言而厲精力學人所莫及季弟克國早卒野王撫幼孤恩義甚備所撰玉篇輿地志各三十卷符瑞圖顧氏譜傳各十卷分野樞

要續洞冥記玄象表各一卷文集二十卷又撰通史要畧一百卷國史記傳二百卷未就而卒楊慎曰野王著玉篇凡二萬二千七百七十九字以小楷書篆籀十訛其九識者憾之莫旦曰玉篇云梁大同九年二月二十八日黃門侍郎兼太學博士顧野王撰本而不及記室按綱目臨賀王正德宣城王大器俱謀反伏誅若依此言未免助亂而所輔不正矣郡志云侯景之寇郡將袁君正舉兵赴援文檄皆以委公口占便就未嘗立草按綱目吳郡太守袁君正以郡叛



附侯景而不及公以郡志言之則公在梁爲記室在  
陳爲黃門而袁君正爲忠臣以玉篇及綱目言之則  
公在梁爲黃門而袁君正爲反賊今當以玉篇綱目  
爲是徐師曾曰余觀南史載野王事鑿鑿可信而綱  
目書袁君正以郡降景據此則君正未常赴援而野  
王亦不爲用陳書所云大謬也舊志因此并疑臨賀  
宣城之事今按綱目臨賀宣城雖皆有反謀而野王  
爲記室時謀尚未露則亦自不相妨也余傳其事竝  
以南史爲正潘子曰莫志所論雖覈而近苛徐志辨

之當矣但以本傳考之則爲臨賀王記室者公之父  
烜非公也或烜已歿而公繼掌其職事跡旣無所考  
則公之依臨賀亦暫耳不足以病公郡志所書袁君  
正舉兵事皆本陳書南史旣削不載而增城陷逃會  
稽一語蓋君正初以義集兵名爲赴援公適居憂遂  
墨衰從戎文檄之任理或有之所謂杖戈被甲抗詞  
作色卽其事也及君正逗遛觀望按兵不前內有異  
志公度不能與爭始潔身逃之耳初同末異心事曠  
然亦何足爲公諱哉莫志載吳江北門外有地曰顧



墟是公舊宅今立廟致祭公墓在縣北二十里石湖之西下周邨有巨石橫覆人稱曰野王墳此公始終爲邑人之明徵也

### 陸從典

陸從典字由儀瓊之子也年八歲讀沈約回文硯銘援筆擬之便有佳致十二作桺賦其詞尤美從父瑜特所賞愛及瑜將終命家中墳籍皆付之從典乃集瑜文爲廿卷仍自製序從典好學博涉羣書位太子洗馬司徒左西掾陳亡入隋位著作佐郎楊素奏從

典續司馬遷史記迄於隋未就而卒

### 唐

### 陸龜蒙

陸龜蒙字魯望吳興掌故集云吳江人故相元方七世孫父賓虞以進士歷官侍御史龜蒙少高放舉進士一不中往從湖州刺史張搏遊搏歷湖蘇二郡辟

### 以自佐

吳興掌故集云仕爲吳興郡丞張昶人物志云歷湖蘇二郡佐

常至饒州三

日無所詣刺史蔡京率官屬就見之龜蒙不樂拂衣去居松江甫里多所論譔常體江謝賦事名振江右



與顏蕘

松陵集作顏萱

皮日休羅隱吳融爲友咸通中崔璞

守吳郡日休爲部從事與龜蒙爲文會風雨晦冥蓬蒿翳蒼未嘗不作詩璞間爲詩亦令兩人屬和吳中名士多與焉一年間所作盈積龜蒙哀爲十通名曰松陵集初以高士召不至李蔚盧攜素與善及中和中當國召拜左拾遺詔方下而卒光化中韋莊表龜蒙及孟郊等十人皆贈右補闕龜蒙自號天隨子江湖散人甫里先生常自爲甫里先生傳曰甫里先生者不知何許人也人見其耕於甫里故云先生性野

逸無羈檢好讀古聖人書揆六籍識大義就中樂春秋挾摘微指見文中子王仲淹所爲書云三傳作而春秋散淡以爲然貞元中韓晉公常著春秋通例刻之於石意以是學爲已任而顛倒漫漶翳塞無一通者殆將百年人不敢指斥疵類先生恐疑誤後學乃著書撫而辨之先生平居以文章自怡雖幽憂疾病中落然無旬日生計未嘗暫輟點竄塗抹者紙札相壓投於筐箱中歷年不能淨寫一本或好事者取去後於他人家見亦不復謂已作矣少攻歌詩欲與造



物者爭柄遇事輒變化不一其體裁始則較轉波濤  
穿穴險固囚鎖怪異破碎陣敵卒造平淡而後已好  
潔几格窻戶硯席剪然無塵埃得一書詳熟然後置  
於方冊值本卽較不以再三爲限朱黃三毫未嘗一  
日去手所藏雖少咸精實正定可傳借人書有編簡  
斷壞者緝之文字謬誤者刊之樂聞人爲學講評通  
借不倦有無賴者毀拆揉汚或藏去不返先生戚然  
自咎先生貧而不言利問之對曰利者商也今旣士  
矣奈何亂四人之業乎且仲尼孟軻氏所不許先生

之居有地數畝有屋三十楹有田奇十萬步有牛不  
減四十蹄有耕夫百餘指而田汙下暑雨一晝夜則  
與江通無別已田他田也先生由是苦飢困倉無斗  
升畜積乃躬負畚鍤率耕夫以爲具云每歲波雖狂  
不能跳吾防溺吾稼也或譏刺之先生曰堯舜黜瘠  
大禹胼胝彼非聖人耶吾一布衣耳不勤劬何以爲  
妻子之天乎且與蚤蚤名器雀鼠倉庾者何如哉先  
生嗜薺置園於顧渚山下歲入茶租十餘薄爲甌犧  
之實自爲品第書一篇繼茶經茶訣之後南陽張又



新常爲水說凡七等其二曰惠山寺石泉其三曰虎丘寺石井其六曰吳淞江是三水距先生遠不百里高僧逸人時致之以助其好先生始以喜酒得疾血敗氣索者二年而後能起有客至亦潔尊置觶但不復引滿向口耳性不喜與俗人交雖詣門不得見也不置車馬不務慶弔內外姻黨伏臘喪祭未嘗及時往或寒暑得中體性無事時乘小舟設篷席齋一束書茶竈筆牀釣具櫂船郎而已所詣小不會意徑還不畱雖水禽憂起山鹿駭走之不若也人謂之江湖

散人先生乃著江湖散人傳而歌詠之由是混毀譽不能入利口者亦不復致意先生性惰急遇事發作輒不含忍尋復悔之屢改不能矣先生無大過亦無出人事不傳姓名無有得之者豈涪翁漁父江上丈人之流者乎通考晁氏云甫里先生傳新史多取之而獨不云工歌詩笠澤者淞江地名也其集自序云自乾符六年春臥病笠澤時亦隱凡著書詩賦銘記往往雜混而錄之故曰叢書今按其集歌詩爲多又比他文最工新史疎漏如此楊億談苑云龜蒙善爲



賦人有收得賦材皆綴緝屬對差次比擬凡數首有  
題而未就蓋其構思用功之非淺相傳龜蒙多智數  
狡獪居笠澤有內養自長安使杭州舟出舍下小童  
奴以小舟驅羣鴨出內養彈其一綠頭雄鴨折頸龜  
蒙遽從舍出大呼曰此綠鴨有異善人言適將獻狀  
本州貢天子今持此死鴨以詣官自言耳內養少長  
宮禁不知外事信然甚驚駭厚以金帛遺之龜蒙乃  
止因徐問龜蒙此鴨何言龜蒙曰常自呼其名巧捷  
多類此葉茵云茵所居視甫里無一舍遠其地荒僻

眇在淞江之東去驛程猶有數十里使者無由過也  
自武宗暨昭宗凡六十三載未嘗遣內養使杭州揆  
之地理考之唐紀信其爲誣豈談苑別有所據乎潘  
子曰余考先生所居是不一地一在臨頓橋幽居賦  
云陸子居全吳東距長洲故苑一里又云地接虎丘  
門臨鶴市是也一在甫里爲先生躬耕處沒卽葬之  
傍有白蓮寺嘉定中錢塘龔時備建祠堂祀之其後  
有醉人壞其像則先生所爲詩文章皆在腹中是也  
一在震澤鎮亦名笠澤集中自遣詩爲震澤別業所



作有云更感卞峰顏色好曉雲纔散便當門一派溪  
隨箬下流春來無處不汀洲而胡宿撰碑亦稱笠澤  
幽居南直弁峰之色西帶重湖之光弁峰卽卞峰在  
吳興境與震澤接壤而鎮之西有所謂桃源洞者乃  
宋楊侍郎紹雲故居其後則養鴨欄故址在焉自唐  
湖州刺史于頔築塘之後此堤常爲吳越孔道皮日  
休所云入震澤穿松陵抵杭適越亦此道也內養事  
有無雖不可知獨怪茵以一隅之見謂使杭不當經  
甫里是未知談苑所言笠澤卽今之震澤而先生固

非局促爲一鄉之士而已也莫志云先生震澤鎮人  
後居甫里徐志云郡城人晚營別業於震澤蓋各以  
所見言之未有定論然考先生所著曰吳興實錄曰  
松陵集曰笠澤叢書皆邑中之作因以爲名則斷以  
先生系之松陵可也吳興實錄四十卷今不傳僅有  
笠澤叢書八十餘篇合之松陵集凡四百八十一寶  
祐五年甫里人葉茵于文籍中哀集別得一百七十  
一篇總爲二十卷刻置義莊以廣觀覽先生詩文始  
盛行於世



潘子曰吳江之爲縣自梁開平三年吳越王錢鏐割  
吳縣松陵鎮地始置也其先縣境或入吳郡或入吳  
興卽有達人志士無由翹然表見然卽其地遡其人  
亦時有可考者舊志多弗詳載卽所載又多別立名  
類如文苑隱逸之屬余以其人數旣少乃合而一之  
第以時代分其先後自立縣以後始爲類傳噫此數  
賢者能以人重地非以地重人也則論文獻者斷以  
是爲權輿云

松陵文獻

獻集卷二

邑人潘檉章力田撰

人物志二

宋

謝濤

子絳

謝濤字濟之其先居富春父崇禮爲中吳軍節度推  
官因家焉濤幼奇敏年十四講左氏春秋會劉繼元  
平守臣當上賀命吳中文士作表章更數人皆不愜  
意濤私自草之吳士見者大驚常讀書陽山澄照寺



知吳縣羅處約知長洲王禹偁皆與定交曰濟之吾曹敵也淳化三年進士起家爲梓州權鹽院判官李順反成都濤畫策守禦以功遷觀察推官權益州華陽縣時亂後田廬荒廢有詔能占田而倍入租者予之於是腴田悉爲豪右所據流民無所歸濤收詔書悉以田還主改著作佐郎通判壽州知興國軍真宗卽位銳意人物內出朝士有治跡者二十四人名付門下省濤與焉召對長春殿會京東盜起命以屯田員外郎知曹州斬大猾趙諫於市曹人相賀尋命安

撫益利兩路旣還舉所部官三十餘人宰相疑其多濤曰有罪願連坐於是奉使者舉官連坐自濤始上用馮拯薦復召試以尚書兵部員外郎直史館尋兼御史知雜事真宗山陵靈駕所經道路有司請悉壞城門廬舍以過車輿象物濤言先帝車駕封祀儀物大備不聞有所毀撤且遺詔從儉薄今有司治明器侈大以勞州縣非先帝意願下少府裁損之屢以疾求分司明道元年拜太子賓客卒年七十四子絳字希深十歲能屬文十五以父任試秘書省校書郎舉



進士甲科授太常寺奉禮郎知汝陰縣遷光祿寺丞  
上書論四民失業累數千言以楊億薦召試擢秘閣  
校理仁宗初遷太常博士用鄭氏經唐故事議宣祖  
非受命祖不宐配享感生帝請以真宗配議格不行  
天聖中天下水旱蝗起河決滑州絳上書引洪範京  
房傳推災異爲天譴告之意極陳闕失無所諱仁宗  
嘉納與修真宗國史遷祠部員外郎時濤官西京年  
老因求便養通判河南府請闕內館以恢景德之制  
又上書論妖人方士不宐出入禁中請追所賜先生

處士號時莊獻明肅太后莊懿太后起二陵於永安  
一切鐵石畚鍤之需皆不取於民而足歲滿權開封  
府判官言蝗亘田野乃吏不稱職所致願除煩苛之  
命損聚斂之役郭皇后廢絳陳詩白華引申氏褒姒  
爲諷詞甚切至徙三司度支判官初詔禁用織密花  
透背云自掖庭始旣而賜內人衣復取於有司又後  
苑制玳瑁器索龜筒於市龜筒禁物非民間所有絳  
皆論罷之又請罷內降凡詔令皆繇中書樞密然後  
行遷兵部員外郎以父憂去服除擢知制誥判吏部



流內銓吏部擬官舊視職田有無不問多寡以是不均絳爲覈實差等其有名無實者皆不用人以爲便寶元中使契丹還請知鄧州爲政寬厚務敦教化議復名信臣六門堰以溉民田功未就而卒年四十六絳以文學知名措辭適雅有元白風歐陽修尤所稱許爲人修潔醞藉常請於郡立學所至大興黌舍在河南修國子學教諸生遠近大集登第者十七人聞絳卒皆出涕繪像於學而祀之絳好施宗族喜賓客其歿也家無餘貲有文集五十卷子景初景平景回

俱見文學傳

潘子曰吳郡志但言濤自富陽遷蘇盧王二志因之不詳其居何邑也及考徐師曾科第表首列淳化三年進士謝濤官太子賓客乃知邑中前此無得雋者至濤始以楚材晉用爲多士先驅吾安得不急著之以彰筭路藍縷之功哉舊志於濤父子服官建白間有未核茲特采史傳及歐陽子文集稍爲更定又考舊志絳卒立祠於百花洲蓋謝氏自絳以下再遷蘇城遂爲郡人矣



魏憲

魏憲字令則紹聖四年進士與弟志俱有聲太學號熙豐人才憲累遷國子司業親喪三年不御酒肉廬於墓側有芝草甘露之祥再爲司業以學行見推尋兼太子舍人遷中書舍人給事中其文溫厚雅正得代言體宣和二年以直龍圖閣知常州三年除太常少卿歷顯謨閣學士知明州建炎二年爲吏部侍郎時車駕南遷案牘散佚吏緣爲奸有僞名寄貫之弊憲請嚴保任以覈實開告賞以止姦急期會以取閱

又言古未有背天險以爲都者敵騎由京西不四五日可至淮泗宜有以待之久之以直學士左太中大夫提舉江州太平觀進吳郡開國侯致仕歸名所居曰止菴學者稱爲止菴先生年七十三無疾而卒今列鄉賢祠弟志元祐六年進士賁政和七年進士志四世孫汝賢淳祐四年特奏名狀元

王份

王份字文儒少力學工詩文隆興中以特恩補大冶令律身清謹政尚寬恕修學校置田養士遇有疑獄



卽露禱於天以祈神助縣產鐵舊有鐵務病民份奏減其額民德之繪像祀焉在縣七年一日登西塞山誦張志和漁父詞慨然嘆息卽日致仕歸作室於雪灘之上枕江水爲圃故有柳塘花嶼景物秀野自號臞菴居士士大夫題詠甚多故名臞菴詩集後三十年陸遊過吳江感其竹樹茂密風流猶存語見入蜀記中先是紹興間知縣石公轍改建學校以地隘爲言份時未仕卽割其居址之東偏以獻公轍嘉之比諸范文正公至乾道三年知縣趙伯虛改建三高祠

份又割其居址之西偏以獻寶祐三年知縣曹良朋復新其祠份孫栗再割地以廣之成先志也今列鄉賢祠

范成大 趙礪老附

范成大字至能 宋史云吳郡人按宋初置平江府改蘇州後復爲平江無吳郡之名史但因成大所自署者稱之不能定其爲何縣人也而郡志以其所居石湖在吳縣境直以爲吳縣人吳江志亦列之寓賢今考石湖界吳縣吳江二邑之間其生平篇詠在松陵者尤多則成大又當爲吳江人矣

父雱字伯達秘書郎成大年十二徧讀經史十四能文詞父亡讀書崑山薦嚴寺十年不出紹興二十四



年舉進士授戶曹監和劑局隆興初纂類高宗朝政  
除樞密院編修官遷正字乾道初校書郎編修國史  
歷著作郎吏部郎官言者論其超躐罷奉祠起知處  
州入對首陳虛文之害帝嘉納至州創義役隨戶富  
貧輸金置田助受役者詔頒其法於諸路處多山田  
爲修梁時通濟堰壘石築防置隄閘四十九所立水  
則三等漑灌有序重刻堰規於石民賴其利除禮部  
員外郎兼崇政殿說書隆興再議和失定受書之禮  
帝嘗悔之遷成大起居郎假資政殿大學士克金祈

請國信使國書專求陵寢蓋汎使也帝臨遣之曰卿  
氣宇不羣朕親加選擇聞外議洶洶官屬皆憚行成  
大對曰無故遣汎使近於求釁不執則僂臣已立後  
仍區處家事爲不還計心甚安之帝愀然曰朕不敗  
盟發兵何至害卿成大乞并載受書事不從金逐使  
者慕其名至求巾幘効之成大知其法嚴附請決不  
可達秘不語二使遂不復疑至燕山夜蔽帷秉燭草  
奏懷之具言他日北使至欲令親王受書旣入進國  
書詞氣慷慨金人方傾聽成大忽奏兩朝旣爲叔姪



而受書禮未稱臣有奏摺笏出之金主大駭顧諱宣  
徽副使韓綱曰有請當語館伴此豈獻書處耶厲聲  
令綽起者三成大不爲動曰奏不達歸必死寧死於  
此時金廷紛然太子欲殺成大其兄越王止之旣還  
館金主遣伴使取奏綱語成大曰公殿上之爭主上  
嘉歎可以激勸兩朝臣子十月使還金人報書有抑  
聞附請之辭欲變受書之禮出於不意要以必從之  
語帝由是知其忠勁有大用意除中書舍人帝用知  
閣門事樞密都承旨張說爲簽書成大畱詞頭七日

不下因請對徐出制草納榻前帝色變成大委曲陳  
譬說命竟寢尋以集賢殿修撰知靜江府廣西兵食  
專仰鹽利漕臣盡取之於是屬邑有增價抑配之弊  
詔復行鈔鹽漕司拘鈔錢均給所部而錢不時至成  
大上疏謂能裁漕司強取之數以寬郡縣則科抑可  
禁從之數年廣州鹽商上書乞復令客販成大出錢  
助之人多以爲非下所司議卒不能易又禁部內暴  
露遺骸籍僧道舍棺無主者葬之尋除敷文閣待制  
四川制置使知成都疏言土蕃青羗兩犯黎州而奴



本朝文獻 卷二  
兒結番列等尤桀黠輕中國臣當較閱將士外修堡  
砦仍講明團結之法使人自爲戰三者非財不可詔  
賜度牒錢四十萬成大以西南諸邊黎爲要地增戰  
兵五千奏置都鹽路分土蕃入寇之路十有八悉築  
柵分戍奴兒結擾安靜砦發飛山軍千人赴之料其  
三日必遁已果然白水砦將王文才私娶蠻女導之  
入寇成大重賞檄羣蠻使相疑貳俄禽文才以獻斬  
之蜀士孫松壽樊漢廣皆挂冠不仕成大表其節詔  
徵之皆不起凡人才可用者悉致幕下用所長不拘

小節其傑然者露章薦之由是遠近歸心進敷文閣  
學士入對除權吏部尚書淳熙五年遷中大夫叅知  
政事兩月爲言者所論奉祠歸起知明州奏罷海物  
之獻除端明殿學士尋擢江東安撫使知建康府歲  
旱奏移軍儲米二十萬以賑飢民減租五萬以病乞  
休進資政殿學士起知福州封吳郡開國侯再領洞  
霄宮紹熙三年加大學士知太平州尋乞歸封吳國  
公明年卒追封崇國公謚文穆成大天資俊朗輔以  
博學爲文瞻麗清逸自成一家尤工於詩自號石湖



居士有石湖集使北有擘轡錄在廣有驂鸞錄虞衡志出蜀有吳船錄家居時與郡士龔頤周南勝成采緝故事爲吳郡志五十卷時與成大同使金顯名者有趙磻老

趙磻老字渭師其先東平人門下侍郎野之姪也徙家邑之黎里鎮以婦翁歐陽懋待制澤入仕孝宗朝爲書狀官隨范成大使金成大歸薦之虞丞相允文亦以爲才擢正言乾道八年以右通直郎知楚州俄入爲大理寺丞淳熙三年由兩浙轉運副使知臨安

府四年除秘閣修撰五年權工部侍郎文獻通考云磻老知臨安坐殿司招兵事謫饒州有拙菴雜著三十卷外集四卷

莫大猷

子子文

莫大猷字廷嘉綺川人其先世居湖州號月河莫氏有名濛者以工部侍郎使金不屈見一統志大猷紹聖中以薦仕至浙東常平司提幹累贈朝請大夫子

子文

石湖志云子文父寧贈朝請郎疑大猷別名寧耳

莫子文字仲武少敏悟通九經諸史寶慶二年舉進



士出知嘉興縣滿考候代會王疇奉使括田法甚苛細子文不從疇譖之田使劾其拒命理宗素知子文止降宣義郎制詞云勤撫字拙催科賢者之常也爾爲令切切愛民乃不能汲汲赴功坐是爲使所劾降爾一秩非朕得已然亦因是以知爾之爲人仁矣田使見之怒奪不與後五年始復其官制詞又曰君子之仕利鈍亦何常之有彼迎合希進之儔乃欲常利而無鈍然至於時論卒亦不能有其有也可嘆已頃奉行田令者倚法而逞爾制邑且受代乃能力抗其

鋒期以不擾畱遺所附民雖主計之臣請黜爾朕不爾忘也五年之踦於今而復士所當爲不止此其益厲所守以副朕意後吏部尚書趙以夫言其能拒括田之令甘心受譴不以病民遷道州通判有美政朝散大夫知廣德軍兼內勸農營田事賜魚袋致仕臨終自爲墓誌甚詳年八十二子若鼎嘉興錄事參軍孫中孚直顯文閣

潘子曰莫志有大猷傳而子文附載科第表之下徐志獨爲子文立傳揚挖備至而不及大猷意莫景周



去國初未遠見聞近真然其義例亦有可疑者及考張景人物志得理宗前後制詞溫厚誠摯淡於激勸其體臣之道至矣予故備錄之以見一時之異數焉

盛明遠

盛明遠太保文肅公度十一世孫也其先汴人度五世孫岫高宗朝爲宣義郎文英殿直建炎初扈蹕南渡通判平江府卜居吳江之儒林里後世遂以科第甲於邑中有名章者登淳熙十四年進士仕至吏部尚書從子文韶文昭先後舉進士爲大官自餘取科

名者不下十餘人最後明遠以咸淳六年領鄉薦爲廣州錄事判官宋亡隱居不仕元世祖聞其賢召判惠州明遠自以世受宋恩義不忍背遂辭不就詔書責迫乃變姓名從老氏以終

譚大年

譚大年字永壽八都人德祐中以薦爲湖州僉判詳載烏程志

元

甯居仁



甯居仁太尉玉之子也本河陽人玉從伯顏南下畱  
戍長橋後以都元帥退老吳江贈魏國武宣公自居  
仁以下遂爲吳江人居仁能修父業累官鎮國上將  
軍廣東道宣慰使都元帥弟居正僉行宣政院事昌  
言江南財賦司副使孫宗玉好書禮有儒者風幼侍  
其父戍湖廣五開衛跋涉艱險父卒事母以孝聞總  
兵知其賢命掌中潮千戶所書記剖決如流人皆稱  
之

王原傑

子思忠

王原傑字子英其先四世祖扈蹕南渡葬邑之陳思  
邨因家焉世業儒至原傑益以學行知名於時元至  
正四年舉於鄉值兵亂不仕乃隱居授徒淡於性理  
之學爲詩文雅健高古學者尊爲貞白先生中書嚶  
子山稱其詩言近指遠發於寬閑寂寞而無月露風  
雲之態識者以爲知言所著有春秋讞議貞白英華  
文集水雲清嘯詩集皆嘗經進今列鄉賢祠子思忠  
亦有文學張士誠據吳屢召不至率義勇保障鄉里  
紀律嚴明若素習兵事者至正末王師東下徐相國



達頓師石里邨而單騎至城下諭降知州楊彝驚懣  
不知所爲思忠謂曰中原淪沒且將百年復爲羣雄  
割據生民之禍極矣今王師弔伐禍自此弭又有山  
卵之勢奈何不歸附乎乃與彝率衆降相國嘉之賜  
思忠旗章俾鎮守焉事平歸里思忠志存康濟不樂  
仕進論者稱王氏父子文武異尚而並有高蹈之節  
云

徐仁榮

徐仁榮字德剛秋澤邨人宋閣門宣贊舍人應勤之

子元至元二十一年辟授崇德州學正重建廟學擢  
翰林國史編修致仕徙居嘉興之新溪卒年六十

章德剛

章德剛柳胥邨人至正中薦爲崑山州學正有詩名  
子孫世居同里爲著姓

崔天德

子齡

崔天德字君誼七都人有幹才博涉書史仕元爲金  
玉局副使值世亂歸泮溪種竹自娛左丞周伯溫題  
其軒曰友竹一時名士如高啓輩皆有詩文子齡字



大年明洪武二十一年以人才徵拜刑部主事上疏  
辭祿以清慎稱後坐黨禍卒於獄

潘子曰邑中文運之開始於紹聖政和間三魏相繼  
以科名顯南渡以後綺川之莫儒林之盛號為蟬聯  
仕宦然莫志載盛氏登科者僅二三人而徐志據其  
家牒增至五十五六人論者譏其輕信至於事行之  
詳亦莫得而述也惟盛明遠以宋之遺臣恥事二姓  
竄跡方外斯可謂無忝家聲者矣

松陵文獻

獻集卷三

邑人潘樞章力田撰

人物志三

明

莫禮

張瑾李鼎徐衍馬達附

莫禮字士敬子文七世孫父諱字芝翁襟度倜儻國  
初嘗召見叅大臣謀議每萬歲節與大姓葛氏沈氏  
進貢稱壽太祖宴賚甚厚又嘗奉詔於京師營建費  
鉅萬計洪武二十年禮以稅戶人才徵為戶部員外



郎與同官沈玠等並奏辭祿洗手居職超擢右侍郎  
轉左侍郎勾較簿書精解版法上甚嘉其能時新爲  
政輕重未有準禮所守功歸於府者衡籍十三四嘗  
云今所爲後請寬焉卒不果二十六年藍黨事起  
同邑顧學文等坐同謀詞連及禮與員外郎張瑾主  
事李鼎崔齡徐衍等俱被誅臨刑賦詩有云一心忠  
義堅如石惟有皇天后土知聞者傷之所著有東邨  
詩稿北征集瑾字叔瑜以人材授工部員外郎與弟  
荊州知府瑄俱坐黨死鼎亦以人材授禮部主事衍

字仲易以人材授工部主事又有馬逵字伯行以人  
材授合水丞憂歸補昌邑丞爲政廉平人不敢干以  
私麤衣糲飯淡如也遷河間衛經歷卒於官

竇德遠

子昇

竇德遠四都克溪人洪武初以明經徵授禮部主客  
郎中擢本部侍郎致仕輯松陵志今不傳子昇亦以  
明經徵爲縣丞父子俱有文名

葛德昭

子芳

葛德昭二十九都人洪武中以人材授刑部員外郎



與同官十七人俱上章辭祿弟德潤與沈萬三連婚  
姻是時四葛四沈名馳江左子芳徐志云字德春  
犯父名恐誤亦

以人材授禮部員外郎後皆坐黨禍死

吳簡

子復頤

吳簡字仲廉桃墩人元至正中就鄉試不利遂杜門  
力學吏嘗召之役簡被儒服執經往同役者皆目笑  
之以薦授郡學訓導遷紹興路學錄洪武四年召至  
京吏部試富民論簡請疏渠以通漑課粟多者第其  
功賞上甚善之授崑山主簿以疾辭歸優遊林泉號

月潭居士年八十二卒簡爲詩文溫厚古雅善論語  
不盡附程朱往往獨出所見所著有論語提要詩義  
史學提綱守約齋集子復頤皆有文名復字孟修在  
元季不仕嘗作感興詩閔元之亡爲時傳誦洪武中  
以人材授湖廣僉事有雪區藁霞外集頤字希程幼  
繼外家冒史姓以明經授本縣學訓導有桃溪集

曾日章

曾燿字日章以字行父朴浙西醫學提舉自杭遷吳  
江家學宮之後日章博學有才智洪武十七年以貢



授黃陂知縣興學校課農桑政聲大著秩滿解官歸  
三十五年以薦擢翰林院侍讀永樂元年與修永樂  
大典未幾奉詔諭安南黎蒼語不遜日章折之具服  
宣讀如禮二年使還陳黎氏篡立當伐狀四年四月  
命從西平侯發雲南兵間道討之又造輕舟數百越  
嶺嶠昇至富良江軍中文檄皆出其手賊平贊畫功  
爲多五年還報復命往諭諸將至軍中以疾卒年六  
十三子堅字孟堅由太僕寺典簿擢知開州入爲禮  
部郎中歷四川雲南左布政使孫鑑知縣潘子曰分  
省人物志以使交南贊師有功系於洪武間此本續  
吳先賢贊之誤不知太祖時未有黎氏父子同惡相  
濟之形而侍讀之擢在洪武三十五年卽靖難後事  
耳今據實錄及王文靖墓碑訂正之

平思忠

平思忠初爲縣小吏事知縣蔣奎有相者來謁奎置  
酒會僚屬令徧相之皆不甚許可顧見思忠執役庭  
下目之曰此人官當至三品而不終奎大以爲妄其  
後奎等皆坐事至或不得其死而思忠歷官叅政落



職以歸竟如相者言建文二年思忠以薦授禮部主

事掾曹名臣錄云永樂中被薦授禮部主事諸書因之考莫志實以庚辰年授職蓋革除後記者諱之

耳永樂三年進郎中時文皇帝方事招懷諸國貢者

日至主客事殷思忠有精力事至立辦尚書呂震才

之以事下獄適漠北貢使至他任主客者不稱職震

因言思忠立出之復其官上以給事中楊弘爲陝西

布政使弘陝西人也欲令清強有力者伺察之遂擢

思忠陝西叅政嘗杖一推官其人誣以賊而是時法

嚴思忠不敢辨坐謫戍北邊太監劉馬兒奉詔市馬

西域以思忠官主客多識遠賈請以自從詔釋其戍

給冠帶隨馬兒使吐蕃諸國而還後卒於家初知府

况鍾與思忠同起小吏官主客有交承之分鍾來蘇

州數延見思忠執禮甚恭方暑畱飲命二子執扇更

侍曰非無僕隸欲使兒輩知公爲我故人耳然思忠

居貧自守未嘗以事干鍾人尤多之性清簡善草書

家有清娛樓莫志畧徐志稍詳今本史鑑撰傳增定

劉鳳曰語稱使於四方宣其辭命招攜貳綏服之豈

易能乎燿再使交人其勤足紀思忠懷遠人致饗餼



其逆也以班有加等益虔使小大莫不得其所再紕  
終以復用豈非其才不可棄耶方是時綜核詳上下  
不敢苟若忠之進退亦文法所不得而裁之矣豈徒  
無害哉

何源

附孫昇

何源初名德源字幼澄同里鎮人從王文靖公汝玉

受易洪武二十九年舉於鄉授德州學正

莫志作保  
德州考英

宗實錄源本傳授山東德州學正  
薦陞本州知州徐志亦同今從之能以師道自任於

是州士始有取科第者以薦擢爲知州爲政廉明歲

旱鄰境多蝗源禱於神蝗不入境州人感之號曰賽

包家以母喪歸起爲梧州知府山水驟至漂廬舍民

多流亡衆議具奏請賑源曰若俟奏報民皆死矣乃

首捐已奉次勸民分廩賑濟所全活甚衆悉毀淫祠

禁競渡久而人不敢變尋以詿誤謫交趾英國公張

輔知其賢舉署交州學事多所造就士之以貢選至

方岳者十餘人後名爲吏部考功員外郎遷鄭府右

長史嘗繪欹器圖進之以盈滿爲戒王敬憚焉事聞

賜敕褒美予金幣復改文選郎中廉靜自持人不敢



于以私正統初擢江西右布政使會詔勾補遼東大  
寧萬全諸衛軍甚急源上言南人弱不耐寒雖至其  
地死亡必多不如簡其幼弱者三千餘人隸南昌衛  
則水土相習訓練易加而朝廷亦得收其用報可民  
甚便之三年入覲上愍其老子致仕歸自號東吳遺  
老家無餘貲惟嗜好書籍年踰八十耳目聰明猶披  
玩不倦子廷璧爲分次部居多至數千卷嘗一謁知  
府况鍾服履敝陋門者呵之弗爲通源不得已自陳  
官階乃大驚叩頭謝源不爲意旣見鍾談笑甚洽及

出府門肩輿不時至源自以爲部民乃徒步歸爲人  
仁厚篤實訓子孫必依於忠孝臨終戒毋作佛事年  
八十六其甥吳驥謂源雄才碩學忠厚謙和嗣續繁  
昌皆陰德所致云孫昇字寅賓成化二年以貢爲曲  
陽縣訓導能爲古詩文後進多從之遊旣致仕歸葺  
源所居遺老堂題一室曰梅屋左圖右書檻外花木  
掩映終日嘯傲客至則焚香瀹茗相對清譚雖貧未

嘗于謁年六十六卒無子

魏尚書驥志源墓云正統三年入覲上憫其老賜歸

又十六年卒而英宗實錄卽書源卒于四年十一月之下不知年月何以參差若是當以墓志爲信



潘子曰劉鳳言源用寬濟斥雖屢竟躋通顯以考終  
觀其所設施無異能碌碌不與物忤故自行間起得  
晉用非有所附麗然哉以余所聞乃不盡然源起行  
間得復用實以受知英公故無論源雅士非附麗人  
者而英公之賢亦非受人附麗者也江西通志稱源  
爲人溫雅歷事五朝文章政事見稱一時英宗實錄  
爲源立傳亦稱其在梧州賑饑之功及奏改遼東諸  
衛幼弱軍隸南昌衛甚爲民便詳源始終鳳之此論  
其亦少恕矣夫

黃珩

父份子著

黃珩字孟珩震澤人父份子原質永樂初舉秀才授  
嶧縣教諭轉岷縣卒官有詩名珩宣德中以文學才  
行徵授溫州府經歷遷縉雲知縣有惠政以母喪去  
任縉雲人送之哭聲載路

見溫州志莫旦乃  
云轉武康誤也

尋起爲

廣東布政司經歷勾較文案以直道不合於叅政檄  
往瓊州視事中嵐氣卒後五十餘年縉雲人有過邑  
中者必問珩後何如且頌其遺愛云子著  
著字誠夫性明爽少以氣節自高成化五年舉進士



授新昌令俗悍善訟鄰邑並苦其暴前令嘗爲民執送京師著至苛察如神不少假借有請謁者輒集僚吏見之如治公府事客皆慙懼不敢發而去民黠桀者悉流之或規其太過著曰不如是亡以禁暴也由是奸人不自容誣之臺司臺司素知著事竟白遷監察御史巡按山西再按廣東芟除汙冗一時殆盡方面以下有穢墨者輒望風解印綬去都御史王越屢稱著才委以腹心有大政必召與議以母喪歸尋卒著好舉淹滯而恩讎太明人多疾之

盛景

舊志畧今叅胡直撰傳及吳錄

盛景初作昶英宗改爲景字允高景泰二年進士

分省

人物志云天  
順間進士誤

授監察御史清山東馬政以災傷上疏

乞蠲民所負孳息從之四年出按廣東值黃蕭養亂後所在凋敝爲披荆榛立制度所下令寬簡不專用威而人畏之瀧水賊起景單騎至其營諭降之還朝言巡撫揭稽不法事失當事意會內苑以翠被飾舩艍張水嬉景偕同官爭之上怒命予杖景伏殿陛呼曰陛下聞古有殺諫臣者未聞以杖殺臣可耳無與



諸人上益怒久之竟叱出明日乃謫景古田典史天  
順元年稍遷羅江知縣盜胡元昂作亂景傳檄解散  
其黨遂捕得之不煩一兵德陽寇趙鐸僭稱趙王所  
至屠僂攻成都覆官軍殺汪都司羅江故無城景令  
引水繞負縣田洞開四門市肆各閉戶藏兵於內又  
伏奇兵山隈約砲舉齊發陽遣迎賊賊入民家未半  
景率死士開門舉砲兵突出遮擊賊首尾不相顧山  
隈兵復至夾攻大敗之斬獲無數邑賴以完歲旱禱  
之得雨景曰此非久計乃教民鑿池一千二百五十

餘所遂爲永利尋擢知叙州府會戎人琪筠高土狍  
叛遣將征討景在行間前軍遇賊而敗景在後突之  
矢著兩耳力戰不肯退賊忽驚亂我師乘之遂大克  
獲上其功未報以創甚謝歸後追理前勞特遣使齎  
璽書金幣賜於家景性友愛自叙州歸置第郡城與  
兄弟居無間言又迎養姑姊之無依者襟度灑落詩  
文高古然頗以簡傲名毀亦終不能掩其大節云羅  
江故無名宦祠景去後民肖像祀於羅真觀提學胡  
直檄縣置祠且爲立傳



劉鳳曰景爲吏近苛然持法不貸能舉操彈至犯顏  
色蒙捽詈摧辱猶抗言矯矯其氣不少暴已乎乃縣  
道佐宣猶爲盡其力崎嶇谷壑山澤之間與士伍同  
勞佚親介胄面夷不避奉職可謂無負若其馮氣而  
驕荷已重而行上不休見笑於佻溺可謂苦矣而不  
自知其失見畏于貪得而權竭於多取居復獲譏於  
時庸亦才之過也乎

潘子曰世固有建言爲名高及一斥而弛然自放於  
職業無所當者若景之折檻廷爭大義皦然不欺矣  
乃能建功於遷謫之餘厲節於介胄之下自非丈夫  
爲志窮益堅老益壯者能之乎而猶以簡傲不免於  
喩訾之口甚矣豪傑之難爲也

范琮

本吳節撰神道碑

范琮

徐志作宗非

字禎彥其先揚州人高祖淵字永澄輕

財好施善吟咏元季避兵隱居同里鎮因家焉父德  
字士能以長厚稱琮簡重寡言負才志宣德四年舉  
於鄉以會試乙榜當授儒官自請卒業南京太學八  
年成進士正統初授工部都水主事轉兵部武庫凡



九年遷南京吏部驗封郎中轉文選兩署堂事廉公  
自守天順四年遷廣東左叅議徐志作叅政誤清軍政覈民  
籍綜理有方奸宄屏息凡三年卒年六十五初琮遭  
喪家居歲大稜途有餓孳出米百石為飢粥以哺飢  
民死不能斂病不能療者則給榘施藥人咸德之有  
許道師者以妖術聚眾剽掠鄉邨自長洲蔓延同里  
時巡檢以事出吏兵莫知所為琮設方畧募丁壯擊  
之渠魁就禽餘皆溺水死且推功令吏兵受賞其才  
畧如是

梅倫

續吳先賢贊作枚姓案正統實錄書擢進士梅倫刑部主事則先賢贊誤也

梅倫字彥常尚湖人正統十三年進士十四年九月  
授刑部主事歷員外郎天順八年乞歸養居瓢溪倫  
久為郎官雍容而已無躁競心時論賢之交章薦達  
成化初復起南刑部持法寬仁多所全活擢湖廣右  
叅議提調武當山兼理軍務職事既簡益務清靜數  
引方士治道術者與修導引法遂無意仕進引年致  
仕生平廉介不愧古人年七十一自撰墓誌而卒  
劉鳳曰仕者之希慕貴榮急進取自非其情亦勢不



得不然其有度不任則讓能而處其下耳至無所謂而優遊卒歲久之不調此非怡然有廉靜無求之操烏能爾耶若倫者寬和有恒奉已約清於通塞之間無所繫吝稱可與立豈虛乎哉

馬忠

馬忠字克誠景泰二年以貢爲高州府通判時境內多事忠在戎馬間頗有勞績致仕歸進階奉議大夫有司舉行鄉飲禮忠在賓位者二十餘年弘治末卒年九十四

莫震

本莫旦續志叅武昌志

莫震字霆威大猷十世孫正統四年進士知嘉魚縣

實錄正統五年十二月戊子擢進士莫震等十三人俱爲知縣

爲人修潔謹於祀事

每秋冬巡行郊野修陂池橋梁爲民興利奏革五重湖河泊所縣有白面山產佳石楚王請於朝遣使來采碑公往來助役護衛軍爲暴者撻之而後具啓後考滿朝王王致謝且命賜宴閩賊鄧茂七作亂上官檄令率民壯出征震訓練有方若素習兵者在嘉魚八年日與僚吏登山臨水飲酒賦詩有古循吏風景



松陽文獻 卷三  
泰二年入覲奉敕運糧於邊以父喪歸服除改知海鹽縣修捍海塘一百七十餘里爲一方保障禽土豪蕭文祥斃於獄民皆稱快遷建寧通判署邵武府事賜敕旌異遷延平府同知致仕歸家無餘貲葺先世綺川舊業居之足跡罕至城市年八十一無疾而卒震性樸雅所著有由菴集嘉魚志子旦自有傳

鈕文

本莫旦續志

鈕文字天章麻溪人其先有號月礪者元時謚清隱處士有名麟者能詩爲嘉興路達魯花赤楊維楨爲

之傳稱其寄征人繭諸詩宏壯振厲與唐人方軌竝馳云文天順三年舉於鄉知溫縣縣多屯軍與民雜處淫暴不法文密謀於上官檄指揮沈鑑率民兵乘夜掩捕悉置於法黃河流沙成地東西長七十里南北八里皆溫地所塌而漲於鞏縣者兩邑爭種年久不決文乃勘明悉歸之溫人考績居最尋以父喪去起爲江西按察司經歷行抵邵伯湖大風覆舟死年五十四爲人孝友忠信在官不攜家累惟一僮執役以廉慎稱



莫昂 從子灝

莫昂字伯顥世居同里鎮祖子讓以高貲實京師遂為宛平人景泰元年舉於鄉授袁州府同知聽政之暇與諸生講學成就為多有奸民武斷鄉里訟者千數累歲不能決上官令昂治之立置於法又有劇盜僭號逐縣長吏出走昂承檄悉生致之居九年以疾歸課子弟讀書後進多執經問難姪岱幼孤育之如已子年五十三卒從子灝正統十二年舉順天府鄉薦第一景泰二年進士授行人卒為人謹厚居貧苦

學

徐琰 父真

徐琰字文玉父真字宗正正統中以吏起家為麗水縣丞在官十八年進階文林郎致仕真職董銀鉞垂橐而歸人以是難之琰家貧教授於鄉門生有餽粟者琰以生學業未成辭不肯受景泰五年貢入太學成化中授泰寧知縣廉謹慈惠克修簠簋二語出何喬遠閩書專務以溫詞化民不尚刑罰有馴鳥巢其庭孕育而去久之乞歸泰寧人祀之學宮琰自秋澤徙居城中



家益貧人有咎其居官不取者琰曰不取吾職貧吾命也又可悔乎今列鄉賢祠

沈信

沈信字宗實其先長洲人徙吳江南郭永樂中爲縣吏正統初授柘城典史守已廉公不憚勞怨時屯田戍卒暴橫侵漁抗疏於朝力劾宿蠹上官器之攝縣事入覲賜敕戒諭以母喪歸尋卒邑人吳驥銘其墓

松陵文獻

獻集卷四

人物志四

邑人潘樛章力田撰

明

汝訥

父思聰子泰

汝訥字行敏黎里鎮人先世皆饒於財父思聰字彥明始爲吏德器溫雅恂恂如儒生永樂中授瀘溪巡簡禽巨盜胡志生等以功擢中城兵馬副指揮遷南京南城兵馬指揮於民所輸課鈔中得金鐲二訪其



主還之景泰元年致仕自號恩隱老人卒年七十六  
訥少好儒術爲詩文格調平曠書法得晉人體而小  
楷尤道美可愛景泰四年舉於鄉成化三年以善書  
選爲中書舍人遷南京武選員外郎進郎中時王端  
毅公恕爲尚書訥與同郡李應禎嘉興呂憲等竝以  
文學爲恕賓客從容談論相得甚歡後訥出爲汀州  
知府以憂歸服除會恕轉吏部選司承恕指問訥所  
欲訥竟無言擬補南安恕以訥文士不便案牘欲更  
之訥聞之曰官可擇耶恕乃聽之南安地瘠陬與嶺

表接壤商貨所委輸細民擔荷自傭裁給朝夕其勢  
家則坐而居積依倚官府役屬小姓爲民患訥至皆  
惴惴奉法無敢旁撓尋報罷人皆惜之訥有清操居  
官三十年田廬不改於諸生時尤好獎成後進同邑  
顧景祥家貧嚮學然性魯鈍教者多謝遣之訥獨悉  
心指授景祥感奮卒成進士訥所著有學鳴集子泰  
恭字元吉一字其通少有大志巋然老成之望未第  
時與同郡李應禎吳寬同邑姚明史鑑竝以文學著  
名所撰文章傳布遠近年五十始舉於鄉又七年而



成進士時弘治九年也授南京考功主事倪岳爲尚書素聞泰名一見喜甚久之遷驗封郎中時岳被召三山林瀚來代以泰有時望奏改考功泰甄別人物辭情竝協久之擢永州知府卒於官所著有來齋集

吳璠

從子鑿

吳璠字朝用爲人嚴毅有幹局景泰七年領鄉薦成化中授中書舍人嘗使韓王王享之嘉其無違禮贈以幣固辭不受居官十七年始遷工部營繕司員外董理神木六廠掌六營造舊以宦者王之諸奸猾多

窟其中部曹往往爲所鉗制璠獨抉摘徑竇令奸人無所容有陳少監者亦稍自戢凡所隱占悉還之官二十一年陝西大饑人相食命總督侍郎李衍賑之廷議以爲河南偃師之東所謂孫家灣者卽隋唐之洛口倉也故窖猶存宜畱漕米之未過淮者四十萬石令從清河口往輸之移秦隴之民就食於彼而漕舟不習河事往者多覆溺議選清强部臣往相水道疏淺濬淤及徵沿河水手分布挽送使避河險遂命璠與戶部郎中許楫同往已而河水淺澁漕舟遷延



數月猶不能達璠建議曰方今七月瓜蒂水生猶膠  
淺若此秋高氣寒風水皆逆舟益濡滯延及嚴冬愈  
不可行此病一也况秦民壯者已散四方弱者饑困  
成疾且顧戀老稚豈能遠來卽來而跋涉關隘必多  
顛踣此病二也米積舟中久不輸瀉動移氣序蒸滯  
侵盜耗失必多此病三也夫救荒利速今天時地利  
咸有所阻當爲權宜以濟之近來米商多從河南販  
陝西故河南米亦翔貴貧者苦之今宜減價糶米易  
銀賞往陝西令彼自糶免其往復之勞利一販者賤

糶貴糶坐獲厚利致米必多不煩勸督則陝西米價  
亦漸就平利二此旣減價以糶河南貧民亦沾其賜  
利三漕舟旣空運卒獲歸利四若堅守前策不知通  
變將恐公私俱困進退失據矣衆皆從之卽具疏聞

上以持論不一奪楫璠奉各二月

按史鑑擬狀止云詔可遠近稱便無

奪奉事考憲宗實錄書是年十二月停戶部郎中許楫等奉各二月初陝西告饑上命發漕運米四十萬石往賑行抵陝州時陝西漸熟而河南復饑議欲就河南賣銀往陝西糶米戶部爲上其事持論不一上責其處置乖謬令自陳至是尚書殷謙而下俱服罪詔釋謙等而罰其屬吏云觀此則賣米一事當時頗有異議而璠於通河漕疏中亦有周爰汴洛已歷十旬茫無寸效日夜憂惶將歸罪司寇之語蓋事雖得



請猶被微譴行  
狀特諱之耳  
先是李衍上言漢唐都關中自河入渭竝通舟楫漕運轉輸以給京師遺跡俱在但三門集津河水悍急請令相度疏鑿以通轉運上併以責璠璠躬自案視考隋唐轉漕遺跡上疏力陳其不可行事得已明年監抽蕪湖竹木踰歲代還卒於京師從子鑿

鑿字汝礪少逸越不羈好學工詩格律高古與趙寬齊名與人交不立崖岸居官以清謹稱成化十三年舉於鄉巡撫王恕聞其名召與語鑿極陳民間利弊

附以經史娓娓不休恕甚異之贈鑿詩期以大用鑿復以詩諷恕益器重之二十三年成進士授兵部武選司主事進員外郎尋遷武庫司郎中卒初鑿拜官當得文選會恕爲吏部尚書同年楊生者欲奪之乃言鑿先事受賀恕聞不得已改鑿武選而以楊生代之後恕數召見鑿鑿終不言恕始悟受欺欲調鑿不果而去其恬退如此嘗遣治大臣葬道聞母訃遂委事徑歸當事者難之鑿曰安有舍親之喪而勤人之喪者乎鑿善書法所著有懶溪集亡子



葉紳 孫可成

葉紳字廷縉其先居洞庭東山有德潤者洪武中以人材徵授陝西布政司理問後徙汾湖爲大族紳性質雅登成化二十三年進士弘治改元以老成選爲戶科給事中以母喪歸三年補吏科八年遷禮科右給事明年轉左上疏請諭教太子又陳修省八事皆切治要上頗采納署科務謹重稱職不事中傷人稱爲長者十一年遷尚寶司少卿卒於官初弘治七年吳中大水民饑紳奉使閩浙過家因上言國家糧餉

率仰給東南而頃者蘇松常杭嘉湖諸郡水道湮塞甚爲農事之患乞命官往治之於是遣工部侍郎徐貫往經理其事人咸德焉孫可成字懋學嘉靖二十四年進士知山陰縣有廉直聲胡宗憲開府辦倭知可成才畱之幕府令參謀畫凡兵食調度攻守形勢皆從中贊決動中機宜吾邑盛墩之捷敵樓之築可成有力焉宗憲性剛有得失軍吏莫敢爭可成善爲調護多所補救嘗有裨將四人失律當斬可成請赦其死責後效卒皆立奇功云以薦擢南京工部主事



謫蒲州同知有嫠婦私於僧誣其子以逆可成佯坐子死令婦具棺及伺具棺者僧也遂納僧於棺生理之而釋其子人咸快之尋免歸卒

吳洪

子山巖

吳洪字禹疇父璋見孝義傳中洪年十二爲縣諸生動必循禮訓導江晟待諸生過巖諸生將訴之督學御史洪曰弟子叛師猶子叛父也不可卒不署名事遂已舉成化十二年進士授南京刑部主事累進郎中擢貴州按察副使以喪歸尋起廣東巡視海道弘

治十二年進福建按察使又二年入爲太僕卿又四年擢工部右侍郎督易州廠正德元年轉左侍郎理部事四年拜南京刑部尚書又二年致仕洪有廉節起家刑曹精於法比多所平反在廣東以海道兼攝鹽政皆號利藪洪獨無所染御下不少假貸宿弊頓革御史王哲欲葺諸公署而難其費洪建議以爲鹽法引納官錢若干獲利數倍顧爲權豪所專請均之於商使輸值佐役便從之鎮守中官初役四水驛舟各一久乃令輸金後又并徵其舟御史汪宗器銳意



革之洪請釐正自今日始勿追所得金於是中官帖服徭人數爲暴官軍往往濫殺要賞遣廷臣往按之悉以委洪廉得其狀捕誅首惡而慰撫其餘邊患遂息在福建城北常有虎患洪爲文禱告虎竟去建寧延平大水民貧且互劫輒便宜賑貸汀漳軍餉缺盜賊蠶起取征商之羨賑之士徭戍者有所索守臣集三司議洪曰不與則致叛與之則爲例不若以賞爲名而姑與之衆皆稱善在工部當劉瑾用事怨劉大夏誣以罪欲殺之下大臣議惟洪與都御史屠應埈

力辨之乃得解徙南京刑部有寧河王鄧愈之後與其弟爭賜田者恃瑾爲援洪執法不阿瑾大怒勒令致仕洪曰吾志也遂歸凡十三年卒年七十八贈太子少保何喬遠閩書曰洪爲人和而不侈莊而不倨在官聽訟以情數辨疑獄布政司吏有微罪鎮守中官銜其使欲重罪吏以爲使累洪厲聲曰殺人媚人吾不爲也子四人其三竝登進士長山次巖幼崑崑字美之仕終嚴州知府

山字靜之正德三年與弟巖同舉進士除刑部主事



累進郎中抗直無私九年不遷官嘗錄囚江西平反疑獄以百計武宗將南巡山偕同官上章諫詔跪殿廷五日杖三十久之擢山東按察副使理驛傳軍務剷除積弊方暑月諸司多所逮繫山量輕重出之無滯囚時有湮井自渫民歌頌之遷陝西右叅政嘉靖二年改浙江以父洪卒不赴五年起爲福建按察使福建故洪治所山聽斷公明法中行恩吏民思洪美山復歌頌之居二年遷江西布政使所至以廉靖長厚有士大夫聲又二年擢副都御史巡撫河南以汴

苦河患乃根極利害著治河通考十卷初河南糧兌小灘民弗便武宗時移臨清又弗便山建議移回隆運官受臨清賄爲浮言山力持之遂爲定制伊王素柔懦宦豎縱恣臨漳府有將軍祐棨者招納亡命剽民財所至人皆罷市山具以聞請薄責王俾自新而免祐棨爲庶人祐棨乃潛走京師誣山罪左降浙江叅議稍遷徙江西叅政尋擢應天府丞十五年以僉都御史巡撫四川明年晉右副都御史提督南贛治尚清簡未幾召爲刑部左侍郎十九年進尚書時翊



國公郭勛以議大禮得幸驕僭不法爲言者所劾下  
廷臣議皆觀望持兩端山獨陳其罪狀論棄市諸黨  
附者以次具獄上內惜勛爲持其奏不下勛竟瘐死  
獄中會當秋報上怒責山論讞後期免其官山卽日  
僦小車角巾就道發疾卒於利國監驛年七十三山  
倜儻魁梧聲如巨鐘性孝友與諸弟析居自取敝廬  
朽物而已與人語洞見底裏不設城府歲飢嘗折逋  
券萬石以爲賑鄉人德之隆慶初詔復官贈太子少  
保弘光元年禮部請賜諡不果今列郡學鄉賢祠

巖字瞻之初爲行人遷工科給事中遼東屬國詣闕  
下訴其使者被殺巖奉詔馳至遼廉其實還言邊吏  
貪首功不治將生邊釁遂抵邊吏罪諸部悅服正德  
九年乾清宮災詔求直言巖條上視朝講學建儲及  
斥養子番僧罷邊兵中市凡數十事言甚切至十三  
年遣諸部使者四出督民逋負併及已蠲除者巖請  
召還又乞遣大臣治東南水利先墾白茆故道引太  
湖水注之海上從其言久之遷四川叅政專理糧儲  
尋奉表入賀道卒



王世貞贊洪像曰嗟于公一法吏子繼之復廷尉民不寃用長世司寇吳考及嗣始爲郎旋正位慶之餘衍來裔贊山像曰公之用法終始在寬及其究也以法失官雖則失官其道乃完白帽單練以附桐棺天王聖明還司寇寇

潘子曰徐志不爲洪立傳余嘗疑之豈以其父子榮顯故抑之耶余先王母及繼母皆吳氏故得備聞其遺事大約篤厚如萬石君明允如于決曹實有餘而文不足者也又覩王公世貞家所藏名賢像洪白哲郡中有以也

王哲

王哲字思德志行剛果有幹局十三爲諸生督學浮梁戴珊以國士期之弘治三年登進士授監察御史福建清軍兼理鹽法時有以同姓被誣爲戍卒者百餘家淹繫累年一訊卽出之十年巡按廣東南海十三郵負固數爲亂鎮巡議屠之哲曰郵戶不下萬餘



玉石俱焚吾不忍也乃率廣州知府輕騎詣其巢諭以禍福許自新皆感泣解散又每邨立土里長以約束之卒以無事十二年上言凡有罪遷口外爲民者跋涉萬里風土不宜往往疾病道死是以家人聚哭如赴西市請自後兩廣及雲南貴州四川福建應遷口外者悉發近衛爲軍下所司議行之遭父喪去官十五年再按江西鎮守太監董讓怙勢驕縱至匿盜賊不以聞哲首劾其不法事上切責讓且以治盜事付哲哲嚴督有司遂禽渠魁賜救獎諭時天旱種不

入土哲親錄繫囚平反數百人翼日雨是秋遂稔又善斷疑獄有大姓被盜誣其怨家賂鎮守欲寘之法哲察其寃釋之鎮守怒衆亦以爲疑後眞盜出衆皆服民間爲之謠曰江西有一哲六月飛霜雪天下有十哲太平無休歇十六年遷山東按察司副使臨清兵備有貢夷私市鹽哲請沒入之而給其直人稱得柔遠體正德三年進廣東按察使明年擢南京右僉都御史理操江事會江西盜起奉敕巡視南贛汀漳斥貪吏去苛政盜聞皆斂跡尋改巡撫以病乞歸正



德八年卒年五十七居家孝友卒之日貧無以殮子孫至不能自存人以此服其廉初豐城諸生雷禮有墓地爲勢家所奪訴之有司俱不敢問及哲至親鞫得其狀時勢家已葬哲竟令徙之而還其地禮後貴顯思哲之德爲具疏復廕其曾孫某官至兩浙鹽運使何喬遠曰哲善讀書尤熟於史嘗言說好話行好事作好人題所居曰好齋有好齋集十卷曾孫有功有功字可大萬曆十一年進士授遂昌知縣興學校平役法宿弊一清十六年兩浙大侵米價踊貴獨遂

昌以賑救有法多所全濟擢廣西道御史先後條上訓儲親朝恤刑諸疏皆切時務遣視陝西茶馬時西邊未靖經畧鄭維詭奏邊寇東歸有功上疏發其奸欺因陳九邊利害甚晰維震恐卽日促寇去西陲以安寧夏叛魏學會葉夢熊先後討賊多用其計謀尋改巡按廣東粵中素饒宦游者多自潤有功一切禁絕黜貪吏鋤豪橫尤畱心庶獄所活以千計性節儉卽與督撫宴會不過五六簋雜以腐菜而已還朝值上以軍政事遷怒謫臺省一時相顧莫敢救有功獨



上疏爭之未下會司禮太監田義有所求不應遂乘間中之與諸臣俱削籍卒天啓四年二月詔贈太常寺少卿有功孝友廉讓歷官雖久貲不加益而親黨待以舉火者甚衆人以爲不愧其先云

潘子曰實錄稱哲爲御史頗有風裁後撫江西時逆藩宸濠常以計去守臣不附已者哲自濠所宴飲歸而病或謂濠中以毒云而徐志稱宸濠畏憚投以鴆毒幸不死遂以疾乞歸踰年卒墓誌則謂其病實以憂勞所致考哲去官在正德六年而卒於八年九月

則憂勞成疾之說果信耶余近從其家得其從孫鼎所記遺事云宸濠欲結婚於公公潛窺其有不軌志遂力拒之是歲夏杪宸濠宴諸督撫密置孔雀毒血於瓜上進公食之少頃煩懣口不能言至自投於井幸羣僚立救屢免殞耳上閔其忠令馳檄還鄉而究以毒發終悲哉然則中毒之事通國皆知之而墓誌作於宸濠未敗時故曲諱之耳誌又言公在江西有都司以賊革者福建林公俊來巡視復用之公不可俊怒移文語侵公公不以介意諭三司曰林公先朝



名臣處斷必不苟蓋偶未詳耳令再具事本末以請  
俊大悔悟卽罷弗用因重愛公比歸賦詩贈別送之  
數程噫公之爲人豈特疆直自遂而已哉

沈漢

沈漢字宗海正德十五年舉於禮部明年世宗入立  
策賜進士授刑科給事中中官馬俊王堂自南京召  
至漢曰人君初政當慎刑賞重命令宦豎旣斥而復  
進端不可開竟論罷之嘉靖改元詔蠲四方逋稅漢  
言逋稅半出侵漁若例免之則猾者生心請差別其

等以惠良民又言近日籍沒之貲不下數千萬請悉  
發以補歲入之不足上皆嘉納會南京風雷之變京  
師地震乃援漢五行志反覆數千言指切時弊其他  
言錦衣不當典刑林俊不當去位皆政體之大者五  
年進右給事中明年遷戶科左給事中李福達獄起  
詞連武定侯郭勛助營庇甚力法司顏頤壽等反坐  
下獄漢上言祖宗之法不可壞權幸之漸不可長國  
之大臣不可辱賊之妖妄不可赦於是權幸惡之坐  
罷歸歸二十年卒隆慶初贈太常寺少卿



陸金

陸金字德如石里邨人正德十二年進士歷工部郎中出知漳州府初至計禽妖賊有惠政士民刻石頌之嘉靖十三年遷江西按察司副使

徐志云仕至福建副使誤

家居貧甚足占守矣

二語本閩書

所著有石里詩集

何遵

本舒芬梓溪集

土蠻附

何遵字孟循其先邑人洪武中以閩右徙南京遂隸籍江寧遵家貧父命之賈心厭之去爲儒或言祿命不利遵笑曰儒固有利不利耶爲諸生因學師策問

范滂母事感之歸告母曰兒設爲滂大人能爲滂母乎母笑而許之正德九年舉進士吏部尚書陸完聞其名使子弟師之會選臺諫獨引疾弗出曰吾不可資人以進也尋授工部主事榷木荆南下令商自百金下減三之一風水敗貲勿算入算者手實其數自識之藏於郡帑數日一會所入比去遵不私一錢十四年三月武宗將南巡郎中黃鞏等疏諫下獄江彬揚言鞏旦夕且死欲以喝止言者而遵已前上疏言淫祀無補敗亂且宗藩中有潛謀不軌者其兆已見



松陽文獻 卷四  
矣彬畏事泄過弗進至是復與林大輅蔣山卿上疏  
極言彬怙權倡亂鞏等無罪願特賜寬宥毋使後世  
有殺諫臣名已受杖肢體盡裂越二日竟卒始遵草  
疏時家童前抱遵哭曰主縱不自計奈親老子幼何  
遵從容語曰毋多言歸爲我謝大人勿令兒子廢學  
足矣遵死之日父聞工部郎有以言獲罪者卽長號  
曰遵死矣夫已而果然世宗卽位贈尚寶卿弘光中  
謚忠節同時杖死者有王鑾字汝和其先亦邑人洪  
武中隸籍錦衣衛正德中舉進士時流賊甫平郡縣

瘡痍未復鑾作原治二篇大略謂今之賊盜皆由守  
令監司惟利是視撫按又樂其趨承罔覈實效以致  
浸淫潰敗故弭盜之本在禁奢立禮敦教懲貪而已  
吏部尚書楊一清異之補文選司主事持正不妄交  
遷考功員外郎朝退扃鍵自防人罕見其面晉驗封  
郎中與同官張衍瑞等合疏諫南巡被杖創甚寢疾  
踰年卒



松陵文獻

獻集卷五

邑人潘樛章力田撰

人物志五

明

盛應期

本名賢紀叅文太史誌

盛應期字斯徵寅四世孫弘治六年進士授工部都水司主事十年司濟寧牖啓閉以時令行者艦相銜進無得爭先官舟或挾私貨輒沒入之道路相戒無敢犯而中官大不便之太監李廣方貴幸其舍人販



私憾南來聞應期令嚴悉投於水廣怒嗾其黨秦文  
誣以阻格薦新大不敬詔逮錦衣衛獄謫雲南安寧  
驛丞稍遷祿豐知縣祿豐古錄率地烏焚蠻所居俗  
獷悍習盜教以禮法弛捕盜之禁盜皆首伏化爲良  
民歷順慶府通判武昌長沙二府同知所至以公廉  
強直稱進雲南僉事分巡金滄洱海諸道景東土知  
府父子信讒至相仇殺乃縛其讒人置之辟曉以大  
義父子如初武定土官鳳英妻攝府與子朝鳴多行  
不法命應期治之乃出不意疾馳入其府母子懼服

因簿責其黨窮竟抵罪悉還所奪於民進副使時鎮  
守太監梁裕漁取無厭應期與御史張璞副使晁必  
登共裁抑之又建議封閉諸礦以絕禍源裕誣以他  
事與璞必登俱逮下詔獄璞坐拷掠死會乾清宮災  
言官論救得復職尋遷河南按察使歷山東右布政  
陝西左布政鎮守太監廖鑾恃內援張甚諸弟縱橫  
關中應期至首執其左右尤無良者用法剪除格其  
一切橫斂鑾銜之先是有勅織罽費鉅萬鑾乃檄取  
直應期發籍按得所支破已踰數萬明日詣鑾鑾方



盛氣以待應期出籍示之問所費如此度必有贏金  
今皆安在願以上聞鑾出不意內愒不能對惶恐跪  
謝乃已武宗將幸榆林衆懼闕供議加賦應期持不  
可命以丁糧差次輸金抵來歲常賦之數比至供億  
悉辦民不知勞扈從諸權幸氣燄薰灼撫監重臣莫  
敢吐氣獨不爲屈有所請干皆裁以法時戶部尚書  
李承勛在行歎曰承勛自謂男子乃今知不逮矣明  
年遷副都御史巡撫四川平六番招討高文林及流  
賊謝文義捷聞璽書褒諭賜金幣以母喪歸嘉靖初

復起巡撫江西自宸濠叛後寇盜充斥而彭蠡尤爲  
盜藪應期設軍巡徼立團保之法籍漁舟爲伍使互  
相覺察盜不能容於是平徭賦議賑救奏免雜調數  
十萬民賴以濟遷兵部侍郎總督兩廣軍事歸善賊  
李文積爲亂發兵討之斬首千五百餘人又討思恩  
土酋劉召俘斬千計召赴火死而田州土酋岑猛尤  
驕恣不法應期謂猛怙惡非勦絕之不可具條上用  
兵方略未報先是應期閱軍實知總兵及太監府占  
冑甚多悉勒歸伍又嚴戢其左右官屬不令暴橫繇



是共爲蜚語聞於當事遂改工部侍郎督易州厰實奪之權也應期乃乞休歸歸四年河決徐沛卽家拜右都御史總理河道應期奏治河四事曰疏曰濬曰築曰改詔許之乃率郎中柯維熊等先治舊河俾通漕而築堤障河之衝又濬趙皮寨白河以殺其勢乃議開新河起昭陽湖以東延袤百四十里役夫九萬八千時方冬月督責過嚴維熊等怨之陰嗾言者劾其非時興役困吏士冰雪中上怒奪其官凡七年以廟恩復職致仕卒年六十二其後朱衡繼之卒開新

河爲運道永利諸所規畫皆自應期發之應期剛果廉幹負氣屹屹不肯下人體貌嚴重家居肅如官府而遇宗族故舊咸有恩禮

王世貞贊像曰是爲直臣於弘治爲材臣於嘉靖之世夫以君仁則臣直君明則臣材能一伸之而不能竟者何哉

劉鳳贊曰應期矯矯亢烈奮難不顧身可謂貞孤絕俗剛慎有執稱社稷臣矣且其才沈密切至長於應變所辦護無不篤繕淹敏可推行少長於里中家大



人與共學董先生嘉謨所董先生數推重其弟子人竊笑之已而竟立功當世今雖漸久聞其風想見其人尚有生氣而彼奄然取寵榮隲溢沒身無患者于志節何有奚益國家哉

潘子曰盛氏入國朝自寅父子而外無聞焉至應期始以功名著偉矣國史稱應期有膽智遇事敢爲自爲司屬時卽以才幹聞然剛褊自遂與物多忤故雖所至有績效而殊不理於口畱城新河之濬實漕道永利應期翔議而撓於浮言蓋首事之難如此又言

應期旣奏開新河因謬議紛起欲急於成功以杜衆口遂以嚴急興怨功未成而罷然其所開新河後三十餘年卒循其遺跡疏之運道至今蒙利云夫新河宜改已有定論獨所謂急於成功者猶未免悠悠之口耳王世貞言新河奉詔以春和興功而公用便宜行事先期調發遂爲言者所劾夫治河者必以霜降水涸爲土功之候未有坐待春和者也而當時莫有爲之辨者然則汲黯發粟當首伏矯制之誅矣又何以稱社稷臣哉



松陽文獻 卷五 五  
陳天祥

陳天祥字元吉其先隸籍武功衛弘治八年舉順天鄉試明年成進士授青州府推官入爲監察御史遷西安府知府歷山東按察司副使整飭天津兵備時流賊劉六等聚衆轉劫天祥嚴號令守要害獲渠魁及其黨七十餘人以功加太僕寺少卿時賊衆兵寡天祥請於朝命都督張俊率精銳援天津天祥與夾攻俘斬甚衆進左僉都御史賊平徵還巡撫貴州洞苗亂天祥發漢土兵攻破諸寨禽斬凡六千餘級捷

聞賜金幣宣大有警命總督軍務會寇先遁進左副都御史改督陝西三邊尋奉命理閩浙鹽道過吳江卒於家天祥警敏有才略臨事能斷所至有聲其在天津功尤著

曹鏞

曹鏞字良金其先本吳姓有爲曹氏後者遂從其姓弘治六年成進士選庶吉士授刑部主事恤刑四川多所平反進員外郎性鯁介尤惡中貴人遇必折辱之坐是左遷東昌府通判時鎮守太監在臨清者尤



暴橫鏐卽抗章劾其罪狀因言伏讀詔書凡鎮守內  
臣非舊制者奏聞裁革臨清一州止有一衛官不滿  
十數軍不滿三千有一兵備副使以坐鎮其地矣守  
備之設尚爲冗濫何必又增鎮守以遺民患乎且臣  
府賦役繁重民財日空賣兒貼婦接踵於途加以水  
旱相仍盜賊竝起公行劫奪莫敢誰何陛下卽位之  
初正宜加惠貧民以收人望豈宜畱此冗員上無補  
於朝下有損於民中不便於有司伏乞勅兵部遵詔  
裁革召還內臣幸甚武宗從之劉瑾怒使人刺鏐陰

事無所得適有爲之營救者事遂得解遷興化府同  
知都司劉全瑾族也恃勢不法鏐舉案其罪降千戶  
已鏐擢湖廣僉事甫去而全卽藉瑾力復舊職鏐聞  
嘆曰時事至此何仕爲遂乞休日與顧應祥文徵明  
諸人游爲古詩文質直不尚雕琢又工繪事於所居  
後積土爲山植桐其上自號桐丘鏐嘗爲一里人所  
侮置不問居數日其人當受役縣官而鏐適爲鄉飲  
賓縣官問其人家貲鏐具以實對遂得免其人愧服  
嘉靖中卒年九十三



王守

王守字履約其先本章姓世爲酒家父徙郡中爲王氏後遂冒其姓守與弟寵俱師事西山蔡羽性篤謹容貌敦重動止皆有尺幅委蛇可觀嘉靖五年舉進士授南昌府推官選爲給事中當張孚敬用事與言官相爲水火而守獨能得其意衆亦不以爲嫌也疏陳六事皆次第施行久之積資至卿寺廻翔兩京進都御史巡撫鄖陽改理河道及召還臺事皆無可見而寬簡有令望務以清靜爲治未嘗喜事有所變更

好潔修論議無所假借慎於接對非其人不交鄉人有自微劣得清華者靳不與一刺性友愛弟寵才名過於兄而守雅自重不爲表暴善筆札有集若干卷黃魯曾曰君詩宗盛唐五言律不減王孟風格自薛君采顧華玉二人外莫之識且重也其於奉餘有二疏之見日具酒殽不遺後人以為妖狂之費蓋吳俗淺躁君韞藉端厚烱哉其救劑云

劉鳳贊曰風之隕也非士能以計才辨智惑亂之也亦在位者不能自持故無所磨厲而使漸靡日以潰



壞將誰咎哉今其流渙渙踵相接於道假以詩請寄者不可勝也昔聞守之言云但謹謝客孤立直行已意保無過咎何以多游從在所嘗滿問遺遍存之使賓客縱橫亂天下國家爲

周用

周用字行之少有異質旣長辭家力學寒暑不解衣弘治十五年舉進士授行人正德初選南京兵科給事中遭父喪尋補故官遷廣東叅議嘉靖初歷浙江副使山東臨清兵備副使進福建按察使河南右布

政使擢右副都御史提督南贛軍事召還四遷爲南京右都御史改南京工部尚書又徙刑部會九廟災自劾免又五年以薦起爲工部尚書總理河道未幾入爲左都御史又二年遷吏部尚書加太子少保卒年七十二贈太子太保謚恭肅初用之再爲南給事出於自請已武宗遣中官迎大寶法王於西番用上章力諫又論倖進諸大臣及江西鎮守太監不法事侃侃出北臺省之上在廣東山盜起用監軍龍川禽斬九百餘級故事嶺南捕賊首功千以上者升奉一



級用不妄殺又以餘功讓同事者故不及格受賞而  
已河南大饑發內幣賑之用自請攝汝寧分守事躬  
行阡陌戶署賑字令民自資以來卽出所貯米物給  
之於是民沾實惠里胥不得爲奸所全活甚衆在南  
贛有劇盜久不獲用察其黨有悔悟者召至諭以禍  
福結以恩信遂禽斬來獻用以治盜當塞其源乃汰  
賊吏緩徵科撫流移踰年盜遂屏跡在南工部有所  
市物吏受賕率先給直而故緩其入黠賈因以爲利  
用令民得自輸物輸已立予之直弊遂絕吏部自嘉

靖初郎中專用事尚書至不暇有所可否而侍郎相  
顧以噤不發言爲知體而郎中者其智力困則盡以  
任吏用至有所舉措必謀之兩侍郎兩侍郎亦樂爲  
之盡而郎中亦遂以簿書任其僚屬吏不得上下其  
手會大計以勞致疾旣革徐文貞階來候竊問其子  
寢食狀用目且瞑遽呼曰兒毋及外事其不亂如此  
性孝友博綜羣書尤深於易禮能古詩文詞旨典則  
兼工書畫所著有讀易日記及文集十六卷今列鄉  
賢祠



潘子曰國史稱用端亮有節操王世貞以爲公有文  
行晚而秉憲握銓天下想望風采凡再司內外察見  
斥者不能修怨當是時貴溪分宜二相勢交軋公處  
之寬如也可謂高朗令終者矣又贊其才不見長善  
無近名力雄萬夫外若不勝而何喬遠則云爲人肅  
括不落時態數言盡之矣余少從公家見其筆札丹  
青慨然嚮往及讀所爲鹽法河渠二疏乃知公政事  
文學有大過人者雖謂之未竟其施可也

顧昂

顧昂字仲光正德十二年進士授將樂知縣縣雜戎  
伍獷悍難治昂至申明約束皆畏戴之入爲刑部主  
事時方議大禮昂上疏不肯附張桂坐奪奉乃以母  
老請改南京遷汝寧知府汝寧多宗藩大姓俗好伎  
刻昂鎮以清靜政化大行後引疾歸先是昂去將樂  
士民思之久而不忘乃立碑縣亭以表其德至今縣  
有顧公祠焉嘗作忠孝經傳注藏於家孫大綱事母  
以孝聞爲詩有雅裁

毛衢



毛衢字大亨少好學求師不遠千里舉嘉靖二年進士授浙江太平知縣調永康俗勁悍前令爲民所訐坐繫獄衢至縛訐者至階下杖殺之乃視事奸民震恐邑中大治遷刑部主事時大禮議起上怒言者切直下法司論治衢上章爭之竟得釋久之擢四川僉事進提學副使所獎拔多知名士卒於官衢性伉直所至禁戢強暴甚有威惠工文章操筆立就初爲諸生與華亭徐階竝爲督學御史蕭鳴鳳所識衢雖功名不及階而政幹稱於時云子圖南壽南竝舉進士

壽南字宇徵爲山陰知縣時浙東諸郡勾餘軍漕運壽南建議永折遂爲著令又築堤麻溪壩以捍外潮民賴其利壽南子以燧以焯先後取科第竝有文名

沈啓

孫季文

沈啓字子由正德中領鄉薦凡七舉至嘉靖十七年始成進士授南工部主事世宗幸承天計水道當出南京將具樓船以待又恐上或從陸徒耗金錢尚書周用以問啓對曰召商庀材於龍江關急驛偵上所從道以日計舟可立辦夫舟而歸直於商不舟而歸



材於商無難也已而上果從陸中官請修孝陵意以  
規利啓與錦衣朱某往視諷之曰高皇帝制皇陵不  
得動寸土違者死今修之當奈何朱某色動見中官  
具道之乃飾壩垣以報先後所省以鉅萬計改刑部  
累進郎中出爲紹興知府會稽新昌蕭山三邑田與  
賦左啓爲平其額而殺之令輕而易完時巡撫朱統  
嚴海船之禁有豪紳陰爲奸民地以啓能得統意而  
解之持美遷啖啓啓不聽遂淡銜之尋遷湖廣副使  
督撫侍郎張岳討黑苗寨屬啓紀功時官兵多縱殺

邀賞啓令獲生口與斬級同自是全活者衆又有卒  
挾一首曰此黑苗酋也啓曰黑苗酋久知名此年少  
必詐也已而酋果出掠岳大賢之上其功然竟坐紹  
興時事罷歸而朱統亦被陷自殺啓歸絕口不言官  
事築室仙人山以著述自娛久之卒年七十八啓身  
若不勝衣而神采高朗博覽羣籍凡陰陽律歷五行  
水利之學靡不研究喜爲詩陸師道評以爲古體沈  
著近體明雋所著有南廠南船二志牧越議略吳江  
水利考及家居諸集數百卷子察字體中博雅能文



自左氏離騷而下多所擬作舉嘉靖十三年鄉試早卒有少虛稿孫季文字少卿萬曆五年進士授工部虞衡司主事久之不調二十年始進都水司郎中督理南河尋遷陝西督學副使又三年轉福建督糧叅政出納有法攝布政事一以仁恕爲本而祛弊不遺餘力

以上數語本閩書

先是閩以倭警增賦季文悉釐正之

二十六年遷四川按察使時播州用兵調發旁午季文積糧製械具有勞績播州平獻俘所條上征討時日地里多淆亂不堪宣讀適季文入覲兵部暮夜往

叩之季文援筆立書三鼓而盡覈之原奏不爽人服其敏二十九年遷山西右布政改山東左布政時以備倭故增餉至五十餘萬季文曰倭去矣安用重困民汰去二十四萬時太監陳增馬堂輩竝爲暴季文建議以包稅請從之山東兌運惟臨清德州小灘爲艱乃議官歛解酌遠近輸錢粟量豐歉爲規制不以煩民三十三年擢副都御史巡撫河南會河決大濬朱旺口役夫十八萬經費不給季文以河南歲輸臨清二倉米頗充溢二倉米直八錢而河上米價贏三



之一請以沿河州縣應輸二倉者畱萬石以八千金輸之則河工可濟國儲無虧上許之兩河旱蝗請蠲賑煮糜墾荒積穀民賴以濟又以稅賦無法條上三事曰稅富民不稅貧民有官稅不宜有私稅徵有稅之稅不徵無稅之稅疏入悉報可兩河兌運在臨清德州者悉如山東法行之著爲令後二年詔建福邸於河南府計費且四十萬季文曰加派則兩河疲困協濟則隣境兵荒乃議畱料價諸課及括庫金佐之故役竣而民不病三十六年以疾乞休踰年卒季文

值歲稔嘗發粟三千石以賑鄉人其在河南嘗貸官錢千計易粟至吳下平糶邑中至今德之

張源

張源字連卿嘉靖元年舉鄉薦歷寧波懷慶二府通判有清操世宗崩遺詔至縣源扶疾哭臨如喪考妣越三日以毀卒年八十八後督學御史耿定向命祀之學宮源有至性事母孝撫孤姪有恩

顧曾唯

顧曾唯字一貫同里人嘉靖三十二年進士授金華



知縣縣故倚郭里甲困於供億曾唯悉裁冗費民甚安之性廉明庭無留獄倭寇溫台有自馬驥嶺入永康武義境者曾唯督民兵守要害倭不敢犯縣學素隘爲買地拓之遷監察御史巡按廣西先是安南貢使至者或十餘年不遣曾唯言遠人內附當以德懷不宜久留使者失信遐外上從之湖廣歲供廣西餉多後期輒以洞庭風波爲解曾唯以衡永諸郡接近廣西道路交通奏請直達人以爲便宗室有犯法者抗章錮之自是豪右屏跡以大父年高請告歸嘉靖

末吳中屢中倭又苦水災曾唯條上禦倭策及賑荒議多見施行鄉人賴之性友愛推故廬與族人共居至四五世猶不改云所著有西臺奏議易說及詩集數十卷今列鄉賢祠

周大章 弟大韶

周大章字一夔邑人多好經術而大章獨明兵法嘉靖三十一年舉於鄉明年三月倭猝犯青陽港知縣楊芷請爲叅謀部署子弟以飛艦斷其上流斬首十八級生禽五人吳人始有戰志三十三年六月倭自



崑山掠閶門南下大章以輕舟邀之斬首十六級明年正月復禦之平望斬首十一級當事偉其功先後賚以銀幣竝辭不受巡撫周琬數訪以兵事檄守朱涇踰年乃罷論功當授官大章以養親辭上曰孝旣可嘉忠亦難泯乃官其子崇仁蘇州衛千戶世襲後大章謁選爲餘姚教諭會瑞安被倭患吏部遂以大章知瑞安縣縣城庠陋乃鳩衆築城九里門皆有樓周以雉堞倭不敢逼卒於官大章才筆奇恣有文藝集及禦倭賦略弟大韶太學生嘗從大章叅謀幕府

立功海上尤精水利之學萬曆五年巡按御史林應訓議開東南水利引大韶與共事首疏長橋兩灘以通十郡之咽喉繼治白茅吳淞七浦諸塘以泄太湖之下流淤者去之淺者濬之而於田間隄岸尤極修舉十年秋颶風淫雨湖海相連不數日水患卽平不爲災大韶又條上浚河之策於當事略曰東南水利源者太湖委者三江諸浦瀦者湖泖洩者溝港河渠海能受水爲百谷之王修治之大綱昔人云在開河在築圍在置閘在今日則築圍爲先開河次之置閘



又次之然常鎮爲上流不疏則無以清其源蘇松爲  
下流不治則無以導其歸故必增二壩復五堰使西  
北之水入於江浚三江通諸浦使東南之水入於海  
時不能盡用今所傳者有水利節略兵家緒言凡數  
十卷

松陽文獻  
卷五



